


Cuminzando cu alcohol den edad di cuatro aña:

Estudio realiza pa U.A:

## 81 por ciento di nos escolarnan por tin experiencia cu alcohol y droga!

ORANJESTAD (AAN) – Na e momentonan aki ta tumanando un Congreso riba adicción na Aruba cual ta contando cu un asistencia basta grandi, y hopi persona cu ta traha riba e tereno aki cu por tin contacto cu adictonan ta participando, y fuera di charlanan tin tayernan di trabao tambe. Tambe ta asina cu a duna un presentacion cu a capta hopi



atencion, relaciona cu un estudio haci pa Universidad di Aruba, riba uso di droga bao alumnonan di school.

Tin resultadonan cu a ser presenta pa Herbert Diaz tocante e estudio aki, y den entrevista cu Matutino DIARIO el a duna nos informacion.

El a duna di conoce cu el a presenta cifranan como resultado di e investigacion y e reaccion di e publico ta muestra cu nan ta haya cu e cifranan aki ta hopi halto, nan ta mire como un problematica y cu ta bayendo pa alarmante pa nos pais.

Locual por a saca afo ta cu na school 55 por ciento di e hobennan ta indica cu nan tabata tin experiencia caba cu alcohol, un 10 por ciento a bisa cu nan no ta tuma alcohol y un 35 por ciento no ta contesta. Esaki ta haci cu e 55 por ciento por wordo subite na 90 por ciento, cu ta duna un probabilidad cu e problema por yega te eynan.

Marihuana a resulta e droga cu mas ta wordo uza pa muchanan di school, unda cu 21 por ciento ta admiti cu nan tin experiencia cu e droga aki. Esnan cu no a contesta e encuesta ta casi 60 por ciento, loke ta duna di pensa y trece e conclusion cu e cantidad cu por tin experiencia por yega na 81 por ciento.

Esaki ta un cifra halto pasobra ta trata di un poblacion di casi 8.300 estudiante cu a wordo entrevista na schoolnan medio, esta MAVO, HAVO y VWO ademas di EPB y Colegio EPI.

Esaki ta conduci na un cifra di casi 6 mil hoben cu rond di un edad di 16 aña, ya caba tin experiencia cu alcohol y otro

droganan ilegal.

E estudio ta revela cu pa loke ta consumo di alcohol e muchanan por tin experiencia for di nan cuatro aña y esaki ta bay te nan 20 aña. Muchanan muher ta cuminsa un tiki mas grandi pero tog na un edad hopi hoben, entre nan seis pa 21 aña!

Encuanto marihuana e ta bay den edad di siete pa 23 aña cerca mucha homber y cerca mucha muher di 9 nuebe pa 21 aña! Señor Herbert Diaz a indica cu esaki kiermen cu na momento cu e muchanan yega school secundario, cu nan diesdos aña, ya caba na e momento ey 480 mucha homber tabata tin experiencia cu alcohol y 450 mucha muher ta admiti tambe esaki. E cifranan, Diaz ta remarca, danki Dios ta hopi mas abao pa marihuana pasobra aki, e muchanan cu a yega diesdos aña, ta raporta cu na nan siete aña e mucha homber y nuebe e mucha muher, 31 mucha a admiti cu nan a purba marihuana: 16 hobencito y 15 hobencita.

Despues por mira con na school e cantidadnan ta sube bay di dos mil pa tres mil den caso di alcohol y den caso di droga e ta bay cu 600 y pico te rond di tres mil pa tres mil cien.



### Skol Basico Washington

Ta anuncia cu e grandioso bingo cu lo mester a tuma lugar diasabra 30 di juni 2012 na Club Caiquetio, ta sigui **Diasabra awor 29 di September 2012, na Club Caiquetio pa 8.00 pm. Registracion ta cuminsa for di 6.00 pm.**

Bar y cushina lo ta bon surti y lo tin hopi doorprize atractivo. Lo tin carchi obtenibel na porta.

Masha danki y nos ta spera tur hende e anochi aki.

Cabesante, personal y alumnonan di Scol Basico Washington.